



**Bosna i Hercegovina
Federacija Bosne i Hercegovine
Srednjobosanski kanton/Kanton Središnja Bosna
Kantonalno tužilaštvo Srednjobosanskog
kantona/Kantonalno tužiteljstvo Središnja Bosna
Travnik**

Broj: T06 0 KT 0038040 25
Travnik, 13.11.2025.godine

OPĆINSKOM SUDU U TRAVNIKU
- Sudiji za prethodno saslušanje -

Na osnovu odredbe člana 45. stav 2. tačka „i“ člana 241 stav 1 Zakona o krivičnom postupku Federacije Bosne i Hercegovine, p o d i ž e m

O P T U Ź N I C U

Potvrđena dana 17.11.2025. godine

Protiv:
A. H.

Zbog postojanja osnovane sumnje da je:

1. U dužem vremenskom periodu pa do 22.08.2025.godine u mjestu Bašbunar bb u Travniku, općina Travnik, protivno odredbama člana 2. stav 2. Pravilnika o držanju opasnih životinja (Sl. glasnik BiH broj: 27/10), posjedovao opasnog psa rase Američki staford kojeg je držao neadekvatno u kući koja nema zaštitnu ogradu i koji je mogao na taj način slobodno izlaziti na ulicu i bez istaknutog upozorenja „opasan pas“, te je protivno odredbama člana 5. stav 5. Pravilnika o držanju opasnih životinja psa nije držao u zatvorenom kavezu odnosno prostoru ili objektu primjerene veličine iz kojeg nije mogao pobjeći, a ulazna vrata i prostor odnosno objekat u kome se nalazio pas nisu bila zaključana, svjestan da psa drži na mjestu bez odgovarajuće zaštite i bez izravnog čuvanja i time izazvao opasnost za život ili tijelo ljudi, što je htio.

Dakle, opasnog psa držao u prostoru bez odgovarajuće zaštite i bez izravnog čuvanja i time izazvao opasnost za život ili tijelo ljudi.

2. Dana 22.08.2025.godine oko 12,00 sati u mjestu Bašbunar bb u Travniku, općina Travnik, izazvao opće opasnim sredstvom opasnost za život ljudi ili imovinu većeg opsega, na način da je ispred porodične kuće u vlasništvu H. i M. A. preko ograde bacio zapaljivu improvizovanu napravu tzv. koktel, na način da je, nakon što je saznao da su ga prijavili policiji i inspekciji zbog izvođenja opasnog psa bez propisane brnjice ili druge odgovarajuće zaštite i bez izravnog čuvanja ispred njegove kuće i na ulicu koja dijeli kuću u kojoj živi A. H. i kuću prijavitelja u kojoj žive sa malodobnom djecom, pred kuću oštećenih H. i M. A. preko zidane ograde visine 2m bacio je pred garažna vrata garaže koja se nalazi u prizemlju kuće stakleni galon sa naljepnicom natpisa "zvijezda majoneza" sa probušenim limenim poklopcem kroz koji je provukao platnenu tkaninu natopljenu benzinom i zapalio, koja se ispred garažnih vrata razbila i na kojoj platnenoj tkanini su pronađeni tragovi gareži, na koji način je opće opasnom radnjom i opće opasnim sredstvom izazvao opasnost za život ljudi ili imovinu većeg opsega, svjestan da stavljanjem benzina u stakleni galon i tkanine koju je provukao kroz otvor na poklopcu kojeg je prethodno načinio, tkanina natopljena benzinom i zapaljena može izazvati opću opasnost opasnom radnjom i opasnim sredstvom za život ljudi ili imovinu većeg opsega, što je i htio.

Dakle, opasnom radnjom i opasnim sredstvom izazvao opasnost za život ljudi ili imovinu većeg opsega u pokušaju.

3. Dana 22.08.2025.godine oko 12,30 sati u ulici Stanična bb u Travniku, općina Travnik, u prostorijama Ministarstva poljoprivrede, vodoprivrede i šumarstva Srednjobosanskog kantona Travnik ugrozio sigurnost veterinarske inspektorice djelatnice tog ministarstva M. V., uputio ozbiljne prijetnje da će napasti na život i tijelo kantonalne veterinarske inspektorice, koja je tog dana obavljala poslove u okviru svoje dužnosti, u jutarnjim satima zbog čestih pritužbi građana i stanovnika mjesne zajednice Bašbunar zbog neadekvatnog čuvanja opasnih pasa od strane osumnjičenog A.H. u dužem vremenskom periodu, pa je inspektorica zajedno sa pripadnicima Policijske stanice Travnik i predstavnika Skloništa za životinje oduzela opasnog psa rase Američki staford, da bi nakon toga nepozvan pristupio u prostoriju tog ministarstva gdje se na svom radnom mjestu nalazila V.M. i obratio joj se riječima „jeste li svjesni šta ste uradili danas i kakve će sad ovo posljedice imati na vas i na komšiluk i zaprijetio joj da će već sutra nabaviti novog opasnog psa i da slijedeći put kada dođe inspektorica da će je napasti“, na koji način je ugrozio sigurnost kantonalne inspektorice ozbiljnom prijetnjom da ako drugi put dođe pred njegovu kuću da će je napasti, što je kod inspektorice

M. V. izazvalo uznemirenost u smislu obavljanja njenih službenih dužnosti i građansku uznemirenost da će napasti na njen život i tijelo, svjestan da direktnim upućivanjem inspektorici prijetnji da će je napasti ukoliko se pojavi ubuduće pred njegovom kućom je izazvalo njeno građansko uznemirenje, što je i htio, zbog čega je slučaj prijavila Policijskoj stanici Travnik.

Dakle, ugrozio sigurnost inspektorice M. V. ozbiljnom prijetnjom da će napasti na život ili organ te osobe.

Čime je počinio krivično djelo Nesavjesno čuvanje pasa i drugih opasnih životinja iz člana 327. stav 1. KZ F BiH (opisano pod tačkom 1) u sticaju sa krivičnim djelom Izazivanje opće opasnosti iz člana 323. stav 1. u vezi sa članom 28. (opisano pod tačkom 2) i krivično djelo Ugrožavanje sigurnosti iz člana 183. stav 1. KZ F BiH (opisano pod tačkom 3), a sve u vezi sa članom 54. istog zakona.

KANTONALNI TUŽILAC

Poštovani predstavnici medija, molimo Vas da prilikom prenošenja vijesti imate u vidu da osobe na koje se odnose vijesti i informacije iz Kantonalnog tužilaštva Travnik, imaju status osumnjičenih ili optuženih osoba. Podsjećamo na načelo presumpcije nevinosti koje definiše da se niko ne može smatrati krivim dok mu se krivica ne dokaže pravosnažnom presudom